

MEMORIA DECLARACIÓN

Artigo 15.2. da Lei 1/2016, do 18 do xaneiro, de transparencia e bo goberno.

CONVENIO DE COLABORACIÓN PARA O ANO 2025, ENTRE A CONSELLERÍA DE POLÍTICA SOCIAL E IGUALDADE E CRUZ ROJA ESPAÑOLA EN GALICIA, PARA O DESENVOLVEMENTO DO "PROXECTO LAR CONTRA A SOIDADE NON DESEXADA." NO MARCO DO PLAN DE RECUPERACIÓN, TRANSFORMACIÓN E RESILIENCIA – FINANCIADO POLA UNIÓN EUROPEA – NEXT GENERATION EU.

O director xeral de Maiores e Atención Sociosanitaria,

DECLARA:

Que esta Dirección Xeral ten previsto formalizar con CRUZ ROJA ESPAÑOLA, o instrumento convencional arriba referido por un período de vixencia que abrangue dende a data de inicio de vixencia do convenio ata o 31 de decembro de 2025.

Que o instrumento convencional ten por obxecto:

O establecemento dun marco de colaboración entre a Consellería de Política Social e Igualdade e Cruz Roja Española a través do cal se contribúa a reducir as situacións de soidade non desexada en persoas con 65 e máis anos e/ou persoas con discapacidade en Galicia, mediante a detección e intervención en ditas situacións diminuindo o illamento social e as situacións de soidade percibida neste colectivo, favorecendo un envellecemento activo así como unha mellora na súa calidade de vida. Para iso, acordan desenvolver o Proxecto LAR contra a soidade non desexada nas catro provincias da Comunidade Autónoma de Galicia.

Que existe converxencia de intereses entre as entidades asinantes en orden á consecución do obxecto referido.

Que o instrumento convencional que se pretende asinar se fundamenta no obxectivo de reducir as situacións de soidade non desexada mediante a detección e intervención en ditas situacións diminuindo o illamento social e as situacións de soidade percibida neste colectivo, favorecendo un envellecemento activo así como unha mellora na súa calidade de vida o cal vai dirixida a posta en marcha e implantación do Proxecto LAR contra a soidade non desexada que se desenvolve de conformidade cos seguintes obxectivos e eixos operativos ou actuacións.

1. Obxectivos:

O obxectivo principal é reducir as situacións de soidade non desexada en persoas con 65 e máis anos e/ou persoas con discapacidade en Galicia, mediante a detección e intervención en ditas situacións.

Como obxectivos secundarios inclúese o deseñar e validar protocolos de detección temperá e atención á soidade non desexada e testar e observar a eficacia e a eficiencia para o obxectivo principal das propostas de innovación social.

2. Eixos operativos:

As actuacións a desenvolver distribúese en 3 eixos operativos:



2.1. Servizo Telefónico Multicanle.

A través dunha Central de Coordinación da soidade non desexada darase a resposta axeitada mediante protocolos predefinidos ás situacións de soidade en persoas maiores e/ou persoas con discapacidade.

A Central de coordinación será a canle de entrada na Rede, realizará a derivación das situacións de soidade detectadas aos Puntos de Atención, e levará a cabo o seguimento das mesmas.

O sistema de entrada das persoas demandantes na rede farase tanto de xeito proactivo (por iniciativa ou solicitude da propia persoa) como reactivo (a iniciativa de axentes sociais da Comunidade, da Administración Pública ou de entidades do Terceiro Sector...).

O servizo establécese de forma pechada para un universo determinado de persoas usuarias, pero coas funcionalidades completas que permitan levar a cabo unha valoración e un posterior dimensionamento de cara a un posterior establecemento con carácter xeral.

PERSONAS USUARIAS: ao longo do ano 2025 traballarase con 1.000 persoas ás que se lles ofrece o servizo de soporte durante a duración da pilotaxe. Son persoas usuarias pertencentes á Rede de Atención Galega propia de Cruz Vermella.

O obxectivo final é diminuír o illamento social e as situacións de soidade percibida neste colectivo, favorecendo un envellecemento activo así como unha mellora na súa calidade de vida.

Sobre o Servizo Telefónico Multicanle pivotan bidireccionalmente os outros dous eixos operativos do proxecto :

2.2. Puntos presenciais de atención á soidade non desexada:

Deséñanse e desenvólvense as prestación de servizos necesarias e as características dos centros de atención ás situacións de soidade non desexada en puntos estratéxicos de Galicia.

O obxectivo dos centros é implementar un servizo que facilite a atención permanente cun plan personalizado para as persoas usuarias en situación de soidade non desexada, o seu seguimento e a intervención profesionalizada coas persoas usuarias de dito servizo.

PERSONAS USUARIAS: 800 persoas maiores e/ou con discapacidade. A selección dos participantes farase tras o establecemento de criterios asociados a casos de risco de soidade e illamento social entre as persoas usuarias pertencentes á Rede de Atención Galega de Cruz Vermella, ao longo de 2025.

2.3. Living Labs de equipamento de teleatención avanzada.

Nos living labs deseñados e implementados neste proxecto establécense 3 avaliacións da prestación tecnolóxica e protocolos asociados en 1) Monitorización de rutinas diarias, 2) Monitorización de hábitos saudables e 3) Experiencias innovadoras baseadas en robótica social.

Os obxectivos son os seguintes:

1. Definir as características necesarias dos dispositivos e sensores tecnolóxicos que permitan monitorizar e facer un seguimento de hábitos de vida en situacións de soidade non desexada.
2. Levar a cabo unha Xestoría de coidados dirixida ás situacións de soidade non desexada: O control e seguimento das pautas e hábitos de vida das persoas usuarias permitirá aos profesionais facer unha intervención eficaz para atender situacións de posible vulnerabilidade en persoas que



sofren sentimento de soidade.

PERSONAS USUARIAS: 180 persoas maiores ou con discapacidade. 100 persoas participan nos living lab 1) monitorización de rutinas diarias e 2) monitorización de hábitos saudables e 80 persoas participan no living lab 3) Experiencias baseadas en robótica social.

A selección das persoas participantes realízase tras o establecemento de criterios asociados a casos de risco de soidade e illamento social entre as persoas usuarias pertencentes á Rede de Atención Galega de Cruz Vermella.

O detalle correspondente ás actividades indicadas anteriormente reflíctese no anexo II do Proxecto.

A Xunta de Galicia, a través da Consellería de Política Social e Igualdade, e Cruz Roja Española consideran prioritario potenciar este tipo de actuacións e están interesados en cooperar na execución de programas directamente ligados coa consecución do benestar dos/as maiores e persoas con discapacidade reducindo as situacións de soidade non desexada, favorecendo un envellecemento activo así como unha mellora na súa calidade de vida.

Considera tamén de especial importancia financiar a programas como o que se describe, con fin de levar a cabo a súa labor social o que fai que non sexa posible promover a concorrència pública para a concesión dunha subvención para tal fin.

De acordo co artigo 2.1.c) da Lei 9/2007, do 13 de xuño, de subvencións de Galicia, o proxecto financiado ten por obxecto o fomento e desenvolvemento dunha actividade de interese social. Ademais, o artigo 19.4.c) da mesma lei establece que, con carácter excepcional, subvencionaranse aquelas actuacións que acrediten razóns de interese social e humanitario. Así mesmo, o artigo 31.2 –en relación co artigo 55– da Lei 13/2008, do 3 de decembro, de Servizos Sociais de Galicia habilita, por razóns de interese público e debidamente xustificadas, a subscrición de convenios singulares con entidades de iniciativa social debidamente autorizadas para a prestación de servizos sociais cando por razóns humanitarias ou de emerxencia social, ou ben cando pola singularidade das características da entidade, a especificidade dos servizos que presta ou a especial vulnerabilidade das persoas usuarios, non sexa posible ou conveniente promover a concorrència pública, como é o caso.

Cruz Roja Española na actualidade conta cos recursos humanos e a estrutura necesaria para o desenvolvemento de dito programa, ademais dunha acreditada experiencia na súa realización, contrastada cos bos resultados acadados ao longo de anos de colaboración.

Así mesmo Cruz Roja achega o valor engadido da súa ampla implantación e capilaridade na nosa Comunidade Autónoma o que supón unha vantaxe lóxística importante que permite o desenvolvemento das actuacións contempladas no proxecto en condicións económicas máis vantaxosas para a Consellería de Política Social e Igualdade.

Considérase polo tanto idónea a Cruz Roja española para a execución de dito programa pola súa experiencia no ámbito da atención asistencial a maiores e discapacitados é a súa ampla implantación na Comunidade Autónoma o que aporta unhas vantaxes únicas que non poden aportar outras entidades.

O convenio de colaboración terá data de efectos e vixencia dende a data da súa sinatura e ata o 31 de decembro de 2025. Non obstante abranguerá as accións obxecto deste convenio que se realicen pola entidade desde o 1 de xaneiro de 2025.

A Consellería de Política Social e Igualdade financiará o custo derivado da execución do presente programa que se subvenciona a través do convenio cunha contía global de 600.000€ con cargo a



fondos procedentes do Mecanismo de Recuperación e Resiliencia, no marco do Plan de Recuperación, Transformación e Resiliencia – Financiado pola Unión Europea – Next Generation EU, segundo o Convenio asinado ao efecto con data do 20/08/2021 entre a Consellería de Política Social e o Ministerio de Derechos Sociales y Agenda 2030 e con cargo á aplicación orzamentaria 08.05.312D.480.1 na que existe crédito axeitado e suficiente para este fin.

Tendo en consideración que o importe total concedido excede os límites previstos no artigo 26.3 da Lei 9/2007, do 13 de xuño de subvencións de Galicia, a concesión de dita subvención requirirá autorización previa do Consello da Xunta de Galicia.

Os intereses converxentes das partes asinantes exclúen o ánimo de lucro, e non poden satisfacerse axeitadamente mediante a celebración dun contrato dos contemplados na Lei 9/2017, do 8 de novembro, de contratos do sector público, pola que se traspoñen ao ordenamento xurídico español as Directivas do Parlamento Europeo e do Consello 2014/23/UE e 2014/24/UE, do 26 de febreiro de 2014, ou doutro instrumento alleo á natureza estritamente convencional.

En atención ao exposto, e a fin de dar cumprimento ao preceptuado no artigo 15.2. da Lei 1/2016, de 18 do xaneiro, de transparencia e bo goberno, estímase xustificado o recurso á sinatura do instrumento convencional que se pretende, con exclusión doutras figuras.

E para que conste, asíñase esta memoria, en Santiago de Compostela, *(na data da sinatura dixital)*.

O director xeral de Maiores e Atención Sociosanitaria

Antonio Acevedo Prado

